

四庫全書

子部

欽定四庫全書

子部

太平廣記卷

四十三至
五十

詳校官中書臣潘有為

侍讀臣孫球覆勘

總校官進士臣楊懋珩

校對官典簿臣汪日贊

謄錄監生臣李玉瓚

謄錄監生臣許立璽

欽定四庫全書

太平廣記卷四十三

神仙四十三

尹真人

廬山人

薛玄真

于壽

尹真人

犍為郡東斗餘里有道觀在深巖中石壁四壅有顏道士居之觀殿有石函長三尺餘其上鑿出鳥獸花卉文

理織妙隣於鬼工而緘鑠極固泯然無毫縷之隙里人相傳云是尹喜石函真人事跡顯於紀傳詳矣真人將上昇以石函付門弟子約之曰此函中有符籙慎不得啓之必有大禍於是郡人盡敬之大歷中有清河崔君為犍為守崔君素有剛果自恃既至郡聞有尹真人函笑謂屬官曰新垣平之詐見矣即詣之且命破鑠顏道士曰此尹真人石函真人有遺教曰啓吾函者有大禍幸君侯無犯仙官之約崔君怒曰尹真人死千歲安得

獨有石函在乎吾不信顏道士確其詞而崔君固不從於是命破其鑠久之而堅然不可動崔君怒又以巨絙係函鼻用數十牛拽其絙鞭而驅之僅半日石函遂開中有符籙數十軸以黃縑為幅丹書其文皆炳然如新崔君既觀畢顧謂顏道士曰吾向者意函中有奇寶故開而閱之今徒有符籙而已於是令緘鑠如舊既歸郡是夕令忽暴卒後三日而寤其官屬將吏輩悉詣崔君問之且訊焉崔君曰吾甚慙未嘗聞神仙事前者偶開

尹真人石函果為冥官追攝初見一人衣紫衣至寢謂
吾曰我吏於冥司者也今奉命召君固不可拒拒則禍
益大矣宜疾去吾始聞憂欲以辭免然不覺與使者俱
出郡城僅行五十里至冥司其官即故相呂公也謂吾
曰子何為開尹真人石函乎奉上帝命且削君之祿壽
果如何哉已而召掾吏至令按吾祿壽之籍掾吏白呂
公曰崔君有官五任有壽十七年今奉上帝符盡奪五
任官又削十五年壽今獨有二年任矣於是聽崔君還

後二年果卒

出宣室志

廬山人

唐寶曆中荊州廬山人常販燒朴石灰往來於白泚南草市時時微露奇跡人不之測賈人趙元卿好事將從之遊乃頻市其所貨設果茗訪其息利之術廬覺謂曰觀子意似不在所市意何也趙乃言竊知長者理形隱德洞過著龜願垂一言廬笑曰今日且驗君主人午時有非常之禍若信吾言當免子可告之將午當有匠者

負囊而至囊中有銀二兩餘必非意相干也可閉闕戒妻
孥勿輕應對及午必極罵須盡家臨水避之若爾徒費
錢三千四百時趙停於百姓張家即遽歸告之張亦素
神盧生乃閉門伺之欲午果有人狀如盧所言叩門求
糴怒其不應因蹴其門張重箠捍之少頃聚人數百張
乃由後門與妻子迴避纔差午其人乃去行數百步忽
蹶倒而死其妻至衆人具告其所為妻痛哭乃適張家
誣其夫死有因官不能評衆具言張閉戶逃避之狀理

者謂張曰汝固無罪可為辦其送死張欣然從斷其妻亦喜及市櫛儻輦正當三千四百文因是人赴之如市盧意以為煩潛逝至復州界維舟於陸奇秀才莊門或語陸盧山人非常人也陸乃請之陸時將入京投相知因請決疑盧曰君今年不可動憂旦夕禍作君所居堂後有錢一甌覆以板非君有也錢主今始三歲君其勿用一錢用必成禍能從吾戒乎陸矍然謝之及盧生去水波未定陸笑謂妻曰盧生言如是吾更何求乎乃命家

童掘地未數尺果遇板徹之有巨瓮散錢滿焉陸喜甚妻亦搬運紉草貫之將及一萬兒女忽暴頭痛不可忍陸曰豈盧生言將徵乎因奔馬追及謝違戒盧生怒曰君用之必禍骨肉骨肉與利輕重君自度也掉舟去之不顧陸馳歸醮而瘞焉兒女乃愈盧生到復州又常與數人間行途遇六七人盛服俱帶酒氣逆鼻盧生忽叱之曰汝等所為不悛性命無幾其人悉羅拜塵中曰不敢不敢其侶訝之盧曰此輩盡劫賊也其異如此元卿

言盧卿狀貌老少不常亦不常見其飲食常語趙生曰
世間刺客隱形者不少道者得隱形術能不試二十年
可以化形名曰脫離後二十年名籍於地仙矣又言刺
客之死屍亦不見所論多奇惟蓋神仙之流也

出酉陽雜俎

薛玄真

薛玄真者唐給事中伯高之高祖也少好道不嗜名宦
遨遊雲泉得長生之道常於五嶺間棲憇每遇人曰九
疑五嶺神仙之墟山水幽奇烟霞勝異如陽朔之峯巒

挺拔博羅之洞府清虛不可忘也所以祝融棲神於衡
阜虞舜登仙於蒼梧赫胥耀跡於潛峰黃帝飛輪於鼎
湖其餘高真列仙人臣輔相騰翥逍遙者無山無之其
故何哉山幽而靈水深而清松竹交映雲蘿杳冥固非
凡骨塵心之所愛也况邃洞之中別開天地瓊膏滴乳
靈草秀芝豈塵目能窺凡屣可履也得延年之道而優
游其地信為樂哉貞元末鄭餘慶郴州長史門吏有自
遠省餘慶者未至柳十餘里店中駐歇與玄真相遇狀

貌如二十三、四神彩俊邁，詞多稽古時語。及開元麟德間，事有如目覩。又言明年二月餘慶當復歸朝，餘言皆神異。問其姓氏，再三不答。懇詰之，云某有志林泉，久棄鄉國，不欲骨肉。知此行止，姓薛名玄真，門吏話於餘慶。令人訪尋，無復蹤跡。明年二月餘慶徵還，及到長安，語及異事。給事中薛伯高流涕對曰：某高祖自左常侍棄官入道，隱終南，不知所終是矣。

出仙傳拾遺

于濤

于濤者唐宰相琮之姪也琮南遷途經平望驛維舟方食有一叟自門而進直抵廳側小閣子以詰濤焉叟之來也驛吏疑從相國而行不之問相國疑是驛中人又不之詰既及濤所憇濤問叟何人也對曰曹老兒問其所來對曰郎君極有好官職此行不用憂濤方將遠陟深抱憂慮聞其言欣然迎待揖之即席濤與表弟前秘書省薛校書俱與之語問其所能云老叟無解但見郎君此後官職高顯不可一一叙之請濡毫執筆隨語記

錄之也如是濤隨叟所授數章詞多隱密迨若謠讖亦
叙相國牽復之事因問薛校書如何叟曰千里之外遇
西則止其有官職雖非真刺史亦作假郡守濤又問某
京中宅內事可以知否叟俛首良久曰京宅甚安今日
堂前有某夫人某尼賓客名字一一審識某廊下有小
童某牽一銅龜子馳戲濤亦審其諦實皆書於編上荏
苒所載已是數幅相顧笑語即將昏瞑濤因指薛芸香
姬者謂叟曰此人如何對曰極好三千里外亦得好官

濤初隨語書事心志銳信及聞此姬亦有好官訝其踈
誕意亦中怠矣時濤表弟杜孺休給事刺湖州寄箬下
酒一壺可五斗因問叟頗好酒否叟忻然為請即以銀
盃授之令自酌飲頃之酒盡已昏晦矣遂以銀盃枕首
而睡時蚊蚋盛無有近叟者及旦失叟唯銀盃在焉方
驚問訪求莫知所止人或云此即曹休博士也曹休魏
之宗室仕晉為史官齊梁間或處朝列得神仙之道多
遊江湖間往來賈販常拯救人以陰功及物人多有見

之受其遺者濤自後授泗州防禦使歙州刺史佐淮南
吳王楊公行密為副使相國尋亦北歸薛校書佐江西
賓幕知袁州軍務值用軍之際挈家之閩至一小邑姬
者俄以疾終山中無求闕器之所托一村翁輟其壽棺
而瘞斯棺裝漆金彩頗甚珍華既瘞之後方驗得好棺
之言及京宅是日賓客小童牽銅龜遊戲之事無不驗

者

出神仙
感應傳

太平廣記卷四十三

欽定四庫全書

太平廣記卷四十四

神仙四十四

田先生

穆將符

房建

蕭洞玄

田先生

田先生者九華洞中大仙也元和中隱於饒州鄱亭村作小學以教村童十數人人不知其神仙矣饒州牧齊

推嫁女與進士李生數月而孕李生赴舉長安其孕婦將產於州之後堂夢鬼神責其腥穢斥逐之推常不信鬼神不敢言未暇移居既產為鬼所惡害耳鼻流血而卒殯於官道側以俟罷郡遷之北歸明年李生下第歸饒日晚於野中見其妻訴以鬼神所害之事乃曰可詣鄱亭村學中告田先生求其神力或可再生耳李如其言詣村學見先生膝行而前首體投地哀告其事願大仙哀而救之先生初亦堅拒李叩告不已涕泗滂沱自

早及夜終不就坐學徒既散先生曰誠懇如此吾亦何
所隱耶但不早相告屋舍已壞矣誠為作一處置即從
舍出百餘步桑林中夜已昏瞑忽光明如晝化為大府
宗門儀衛森列先生寶冠紫帔據案而坐擬於王者乃
傳聲呼地界俄有十餘隊各擁百餘騎奔走而至皆長
丈餘謁者呼名通入曰廬山江濱彭蠡等神到先生曰
刺史女因產為暴鬼所殺事聞之何不申理對曰獄訟
無主未果發謫今賊是鄱陽王吳芮刺史宅是其所居

怒其生產腥穢遂肆兇暴尋又擒吳芮牒天曹而誅戮之勛云李氏妻算命尚有三十二年合生二男三女先生曰屋舍已壞如何有一老吏曰昔東晉鄴下有一人誤死屋宅已壞又合還生與此事同其時葛仙君斷令具魂為身與本無異但壽盡之日無形爾先生許之即只追李妻魂魄合為一體以神膠塗之大王發遣却生即便生矣見有七八女人與李妻相似吏引而至推而合之有藥如稀飴以塗其身頃刻官吏皆散李生及妻

田先生在桑林間李生夫妻懇謝之先生曰但云自得再生勿多言也遂失先生所在李與妻還家其後年壽所生男女皆如所言

出仙傳
拾遺

穆將符

穆將符者唐給事中仁裕之姪也幼而好學不慕聲利不窺世祿而深入玄關縱逸自放不知師匠何人已得吐納內修之道好飲酒高閒傲睨人莫能測之長安東市酒肆姚生與其友善時往來其家則飲酒話道彌日

累文姚忽暴卒舉家惶駭使人奔訪將符際夜方至姚已奄然無復喘息將符方醉其家人哀號告之笑曰可救也無遽憂怖遂解衣與姚同衾而卧戒其家令作人參湯稀粥以候之勿得悲泣驚呼待喚即應滅燭而寢悄然中夜方命燭視之姚已起坐矣少以人參湯注之良久乃以粥助之乃能言曰適為黃衣使者三四人以馬載去西行甚速道途蒙昧如微月之中逡巡有赤色光如日出之狀照其行路黃衣者促轡尤急即聞傳呼

云太乙有敕使天兵遣回乃顧見騎乘旌旗森然成列
所乘馬及黃衣者奔迸不知所之別有朱衣一人引而
歸之自是姚生平復如初將符遁去不知所適羅浮軒
轅先生有道之士也大中年徵入關至京即使人訪之
將符已遞去先生曰穆處士隱仙者也名位列於九清
之上矣勿以其嗜酒昏醉為短真和光混俗爾淮浙間
頗顯其異跡接於聞見若左元放葛孝先之流也

出神
仙拾

遺傳

房建

清河公房建居于含山郡性尚竒好玄元之教常從道士授六甲符及九章真錄積二十年後南遊衡山遇一道士風骨明秀與建語述上清仙都及蓬萊方丈靈異之事一一皆若涉歷建竒之後旬餘建自衡山適南海道士謂建曰吾嘗客於南海迨今十年矣時有寺官李侯者護其軍李侯以玉簪遺我我以簪賜君君宜寶之建得其簪喜且甚因而別去是歲秋建至南海嘗一日

獨遊開元觀觀之北軒有磚塗為真人狀者二焉其位
於東者左立真人及視左立之狀果衡山所遇道士也
奇而歎者且久及覩左立之冠已亡簪矣時有觀居道
士數輩在焉建具以事言次出玉簪示之道士驚曰往
歲有寺官李侯護兵於南海嘗以二玉簪飾左右真人
迨今且十年其左立之簪亡之十年今君所獲果是焉
建奇之因以玉簪歸道士

出宣
室志

蕭洞立

王屋靈都觀道士蕭洞玄志心學鍊神丹積數年卒無所就無何遇神人授以大還祕訣曰法盡此耳然更須得一同心者相為表裏然後可成蓋求諸乎洞玄遂周遊天下歷五嶽四瀆名山異境都城聚落人跡所輳用不畢至經十餘年不得其人至貞元中洞玄自浙東抵揚州至慶亭埭維舟於逆旅主人于時舳艫萬艘隘於河次堰開爭路上下衆船相軋者移時舟人盡力擠之見一人船頓蹙其右臂且折觀者為之寒慄其人顏色

不變亦無呻吟之聲徐歸船中飲食自若洞玄深嗟異
之私喜曰此豈非天佑我乎問其姓名則曰終無為因
與交結話道欣然遂不相捨即俱之王屋洞玄出還丹
祕訣示之無為相與揣摩更終二三年修行備至洞玄
謁無為曰將行道之夕我當作法護持君當謹守丹竈
但至五更無言則攜手上昇矣無為曰我雖無他術至
於忍斷不言君所知也遂十日設壇場焚金鑪飾丹竈
洞玄遠壇行道步虛無為於藥竈前端拱而坐心誓言死

不言一更後忽見兩道士自天而降謂無為曰上帝使
問爾要成道否無為不應須臾又見羣仙自稱王喬安
期等謂曰適來上帝使左右問爾所謂何得不對無為
亦不言有頃見一女人年可二八容華端麗音韻幽閒
綺羅繽紛薰灼動地盤旋良久調戲無為無為亦不顧
俄然有虎狼猛獸十餘種類哮叫騰擲張口向無為無
為亦不動有頃見其祖考父母先亡眷屬等並在其前
謂曰汝見我何得無言無為涕淚交下而終不言俄見

一夜叉身長三丈目如電掣口赤如血朱髮植竿鋸牙
鉤爪直衝無為無為不動既而有黃衫人領二手力至
謂無為曰大王追不願行但言其故即免無為不言黃
衫人即叱二手力可拽去無為不得已而隨之須臾至
一府署云是平等王南面凭几威儀甚嚴厲聲謂無為
曰爾未合至此若能一言自辨即放爾迴無為不對平
等王又令引向獄中看諸受罪者慘毒痛楚萬狀千名
既迴仍謂之曰爾若不言便入此中矣無為心雖恐懼

終亦不言平等王曰即令別受生不得放歸本處無為
自此心迷寂無所知俄然復覺其身託生於長安貴人
王氏家初在母胎猶記宿誓不言既生相貌具足唯不
解啼三日滿月其家大會親賓廣張聲樂乳母抱兒出
衆中遞相憐撫父母相謂曰我兒他日必是貴人因名
曰貴郎聰慧日甚祇不解啼纔及三歲便行弱不好弄
至五六歲雖不能言所為雅有高致十歲操筆即成文
章動靜嬉遊必盈紙墨既及弱冠儀形甚都舉止雍雍

可為人表然自以瘖瘂不肯入仕其家富比王室金玉
滿堂婢妾歌童極於奢侈年二十六父母為之娶妻妻
亦豪家又絕代姿容工巧伎樂無不妙絕貴郎官名慎
微一生自矜快樂娶妻一年生一男端敏惠黠畧無倫
比慎微愛念復過常情一旦妻及慎微俱在春庭遊戲
庭中有盤石可為十人之坐妻抱其子在上忽謂慎微
曰觀君於我恩愛甚深今日若不為我發言便當撲殺
君兒慎微爭其子不勝妻舉手向石撲之腦髓迸出慎

微痛惜撫膺不覺失聲驚駭恍然而寤則在丹竈之前
而向之盤石乃丹竈也時洞玄壇上法事方畢天欲曉
矣俄聞無為歎息之聲忽失丹竈所在二人相與慟哭
即更鍊心修行後亦不知所終

出河東記

太平廣記卷四十四

欽定四庫全書

太平廣記卷四十五

神仙四十五

賈耽

丁約

瞿道士

王卿

衡山隱者

梅真君

賈耽

唐相國賈耽滑州節度使常令造鹿皮衣一副既成選
一趨捷官健操書緘付之曰汝往某山中但荆棘深處

即行覓張尊師送此書任汝遠近使者受命挈糧而去甚惶惑入山約行百餘里荆棘深險無不備歷至一峰半腰中石壁聳拔見二道流碁次使者遂拜道流曰賈相公使來開書大笑遂作報書一曰傳語相公早歸何故如此貪着富貴使者齎書而返賈公極喜厚賞之亦不知其故也又嘗令一健卒入枯井中取文書果得數軸皆道書也遂遣十餘人寫纔畢有道士突入呼賈公姓名叫罵曰爭敢偷書賈公遜謝道士曰復持去鄭州

僕射陂東有一浮圖乃遣使齎牒牒州於此浮圖內取
一白鴉遂令掩之果得以籠送亦不知何故賈公謫仙
事甚衆此三篇尤明顯者也

出逸
史

丁約

唐大歷中有韋行式為西州採訪使有姪曰子威年及
弱冠聰敏溫克耽翫道書溺惑神仙修煉之術有步卒
丁約者執廝役於部下周旋恪勤未嘗少怠子威頗私
之一日辭氣慘慄云欲他適子威怒曰籍在軍中焉容

自便丁曰去計已果不可留也然某肅勤左右二載于茲未能忘情思有以報某非碌碌求食者尚縈俗間耳有藥一粒願以贈別此非能長生限內無他恙矣因褫衣帶內得藥類粟以奉子威又謂曰郎君道情深厚不欺暗室終當棄俗尚隔兩塵子威曰何謂兩塵對曰儒謂之世釋謂之劫道謂之塵善堅此心亦復遐壽五十年近京相遇此際無相訝也言訖而出子威驚愕亟命追之已不及矣主將以逃亡上狀請落兵籍爾後子威

行思坐念留意尋訪竟亡其蹤後擢明經第調數邑宰
及從心之歲毛髮皆鶴時元和十三年也將還京輦夕
于驪山旅舍聞通衢甚喧詢其由曰劉悟執逆賊李師
道下將校至闕下步出視之則兵仗嚴衛桎梏累累其
中一人乃丁約也反接雙臂長驅而西齒髮彊壯無異
昔日子威大奇之百千人中驚認之際丁已見矣微笑
遙謂曰尚記臨卬別否一瞬五十年矣幸今相見請送
至前驛須臾到滋水驛則散繫于廊舍開一竅以給食

物子威窺之俄見脫置桎梏覆之以席躍自竇出與子
威攜手上旗亭話闊別之恨且歎子威之衰老子威謂
曰仙兄既有先見之明聖朝奄宅天下何為私叛臣耶
丁曰言之久矣何迓哉蜀國睽辭豈不云近京相遇慎
勿多訝乎又問曰果就刑否對曰道中有尸解兵解水
解火解實繁有徒嵇康郭璞皆受戕害我以此委蛻耳
異韓彭與冀壤并也某或思避自此而迓孰能追也他
問不對唯云須筆子威搜書囊而進亦媿領之威曰明

晨法場寓目豈蛻于此乎丁曰未也夕當甚雨不克行
刑兩晝雨止國有小故十九日天限方及君於此時幸
一訪別言訖還館復自穴入荷校以坐子威却往溫泉
日已晡矣風埃忽起夜中果大雨澍遲明泥及骭詔改
日行刑雨宿方霽則王姬有薨于外館者復三日不視
朝果至十九日方獻廟巡鄜始行大戮子威是日飯僕
飽馬詰旦往棘園候焉亭午間方號令迴觀者不啻億
兆衆矣面語不辨寸步相失俘囚繞至丁已誌焉遙目

子威笑領三四及揮刃之際子威獨見斷筆霜鋒倏忽
之次丁因躍出而廣衆之中躡足以進又登酒肆其言
如蜀脫衣換觴與威對飲云某自此遊適矣勉於奉道
猶隔兩塵當奉候于崑崙石室矣言訖下旗亭冉冉西
去數步而滅

出廣
異記

瞿道士

黃尊師修道於茅山法錄絕高靈應非一弟子瞿道士
年少不甚精懇屢為黃師所答草堂東有一小洞高八

尺荒蔓蒙蔽似蛇虺所伏一日瞿生又怠惰為師所箠
逡巡避杖遂入此洞黃公驚異遣去草搜索一無所見
食頃方出持一碁子曰適觀秦時人留食見遺此秦人
碁子也黃公方恠之尚意其狐狸所魅亦不甚信茅山
世傳仙府學道者數百千皆宗黃公悉以為德業階品
尋合上昇每至良辰無不瞻望雲鶴明年八月望夜天
氣晴肅月光如晝中宵雲霧大起其雲五色集於牕牖
間仙樂滿庭復有步虛之聲弟子皆以為黃公上仙之

期至矣遽備香火黃公沐浴朝服以候真侶將曉氛烟
漸散見瞿生乘五色雲自東方出在庭中靈樂鸞鶴彌
漫空際於雲間再拜黃公曰尊師即當來更務修造亦
不久矣復與諸徒訣別乘風遂去漸遠不見隱隱猶聞
衆樂之音金陵父老每傳此事

出逸史

王卿

唐貞元年中郢中有酒肆王卿者店近南郭每至節日
當有一道士過之飲訖出郭而去如是數年後因道士

復來卿遂結束潛行尋之數里道士顧見大驚曰何來
卿乃禮拜願神人許為僕使道士固辭卿固隨之每過
澗壑或高闊丈餘道士踰越輕舉而過卿輕踵之亦能
渡也行數十里一巖高百餘丈道士騰身而起卿不能
登遂哀求禮拜道士自上謂曰汝何苦從我自速歸不
爾坐受困躓也卿曰前所渡險阻皆賴尊師命令却歸
無路必死矣願見救護道士垂手巖下令卿舉手閉目
躍身翕飛已至巖上上則平曠煙景不類人間又從行

十餘里至道士舍門庭整肅止卿於舍外草間謂曰汝且止此吾為汝送飯食候便令汝得見天師卿潛草間道士三日每送飯食亦皆充足後一日忽見天師出門杖策道士四五人侍從天師形狀瓌偉眉目踈朗道士私招卿令於道左禮謁天師驚曰汝何因得至此卿方謂說諸道士曰此人謹厚恐堪役使可且令守竈天師令且收之遂延卿入院至厨下見一大竈下燃火上有鐵甬閉蓋數重道士令卿守竈專看之不得妄視令失

墜餘道士四人或汲水採藥蒸曝造食以供天師夜亦
令卿臥廚下守火經六七日都不見人來看視釜中物
者後一日卿無何竊開窺藥忽見一白兔從鐵筩中走
出驕然有聲道士曰藥已失矣競來窺看惶懼失色須
臾天師大怒曰何忽引俗人來令失藥俄召前道士責
辱欲鞭之道士叩頭請却擒覓道士數人於庭施香禹
步道士二人變成白鶴冲天而飛食頃鶴已擒得白兔
來令投釜中固濟鍊之天師令速逐俗人遣歸道士遂

領出曰卿幾悞我卿心未堅可且歸去遂引送至高巖
下執手而別後二十年於汾州市中相見耳卿復尋路
歸數日方至郭已經年遂為道士十餘年後遊太原竟
不知當有所遇否

出原
化記

衡山隱者

衡山隱者不知姓名數因賣藥徃來岳寺寄宿或時四
五日無所食僧徒恠之復賣藥至僧所寺衆見不食知
是異人敬接甚厚會樂人將女詣寺其女有色衆欲取

之父母求五百千莫不引退隱者聞女嫁邀僧往看喜
欲取之仍將黃金兩挺正二百兩謂女父曰此金直七
百貫今亦不論付金畢將去樂師時充官便倉卒使別
隱者示其所居云去此四十餘里但至山當知也女父
母事畢憶女乃往訪之正見朱門崇麗扣門隱者與女
俱出迎接初至一食便不復饑留連五六日亦不思食
父母將還隱者以五色箱盛黃金五挺贈送謂父母曰
此間深邃不復人居此後無煩更求也其後父母重往

但見山草無復人居方知神仙之窟

出廣異記

梅真君

汝陰人崔景唐家甚富嘗有道士自言姓梅來訪崔崔客之數月景唐市得玉鞍將之壽春以獻節度使高審思謂梅曰先生但居此吾將詣壽春旬月而還使兒姪輩奉事無所憂也梅曰吾乃壽春人也將此訪一親知比將還矣君其先往也久居於此思有以奉報君家有水銀乎曰有即以十兩奉之梅乃置鼎中以水銀煉之

少久即成白銀矣因以與景唐曰以此為路糧君至壽
春可於城東訪梅氏數日不得村人皆曰此中無梅家
春即詣城東訪梅氏數日不得村人皆曰此中無梅家
亦無為道士者唯淮南嶽廟中有梅真君像得非此耶
如其言訪之果梅真君矣自後竟不復遇

出稽
神錄

太平廣記卷四十五

欽定四庫全書

太平廣記卷四十六

神仙四十六

白幽求

王太虛

王子芝

劉商

白幽求

唐貞元十一年秀才白幽求頻年下第其年失志後乃從新羅王子過海於大謝公島夜遭風與徒侶數十人

為風所飄南馳兩日兩夜不知幾千萬里風稍定徐行
見有山林乃整棹望之及前到山高萬仞南面半腹有
城壁臺閣門宇甚壯麗維舟而昇至城一二里皆龍虎
列坐於道兩邊見幽求乃眈眈而視幽求幽求進路甚
恐懼欲求從者失聲彷徨次於大樹枝為風相磨如人
言誦詩聲幽求諦聽之乃曰玉幢亘碧虛此乃真人居
徘徊仍未進邪省猶難除幽求猶疑未敢前俄有朱衣
人自城門而出傳勅曰西嶽真君來遊諸龍虎皆俯伏

曰未到幽求因趨走前見朱衣人不顧而入幽求進退
不得左右諸龍虎時時目幽求盤旋次門中數十人出
龍虎奔走人皆乘之下山幽求亦隨之至維舟處諸騎
龍虎人皆履海面而行須臾沒於遠碧中幽求未知所
適舟中具饌次忽見從西旗節隊伍僅千人鸞鶴青鳥
飛引於路騎龍控虎乘龜乘魚有乘朱鬣馬人衣紫雲
日月衣上張翠蓋如風而至幽求但俯伏而已乃入城
門幽求又隨覘之諸龍虎等依前列位與樹木花藥鳥

雀等皆應節盤迴如舞，幽求身亦不覺足之蹈之。食頃，朱衣人持一牒出，謂龍虎曰：「使水府真君。」龍虎未前，朱衣人乃顧幽求，授牒。幽求未知所適，朱衣曰：「使水府以手指之。」幽求隨指而身如乘風下山，入海底。雖入水而不知為水，朦朧如日中行。亦有樹木花卉觸之，珊珊然有聲。須臾至一城，宮室甚偉，門人驚顧，俯伏於路。俄而有數十人皆龍頭鱗身，執旗杖引幽求入水府。真君於殿下北面授符牒，拜起乃出門。已有龍虎騎從，儼然遂

行瞬息到舊所幽求至門又不敢入雖未食亦不覺餒
少頃有覓水府使者幽求應唯而入殿前拜引於西廊
下接諸使下坐飯食非人間之味徐問諸使中此何處
也對曰諸真君遊春臺也主人是東嶽真君春夏秋冬
各有位各在諸方主人亦各隨地分也其殿東廊下列
玉女數百人奏樂白鶴孔雀皆舉翅動足更應絃歌日
晚乃出殿於山東西為迎月殿又有一宮觀望日至申
時明月出矣諸真君各為迎月詩其一真君詩曰日落

煙水黯驪珠色豈昏寒光射萬里霜縞遍千門又一真君
詩曰玉魄東方開嫦娥逐影來洗心兼滌目光影遊春
臺又一真君詩曰清波滔碧烏天藏黯黯連二儀不辨
處忽吐清光圓又一真君詩曰烏沉海西岸蟾吐天東
頭忘下句其餘詩並忘之矣賦詩罷一真君乃命夜戲
須臾童兒玉女三十餘人或坐空虛或行海面笙簫衆
樂更唱迭和有唱步虛歌者數十百輩幽求記其一焉
詞曰鳳凰三十六碧天高太清元君夫人蹋雲語冷風

颯颯吹鶴笙至四更有緋衣人走入鞠躬屈膝白天欲
曙唯而趨出諸君命駕各辭次日昨朱衣人屈膝言曰
白幽求已充水府使有勞績諸真君議曰便與遊春臺
灑掃幽求恓惶拜乞却歸故鄉一真君曰卿在何處對
曰在秦中又曰汝歸鄉何戀戀也幽求未答又曰使隨
吾來朱衣人指隨西嶽真君諸真君亦各下山並自有
龍虎鸞鳳朱鬣馬龜魚旛節羽旄等每真君有千餘人
履海面而行幽求亦操舟隨西嶽真君後自有便風迅

速如電平明至一島見真君上飛而去幽求舟為所限
乃離舟上島目送真君猶見旗節隱隱而漸沒幽求方
悔恨慟哭而迢迢上島行乃望有人烟漸前就問云是
明州又却喜歸舊國幽求自是休糧常服茯苓好遊山
水多在五嶽永絕宦情矣

出博異志

王太虛

東極真人王太虛隱居王屋山中咸通壬辰歲王屋令
王琮夙志崇道常念黃庭經每欲自為註解而未了深

玄之理但日誦五六千遍聞王屋小有洞天神仙之府
求為王屋令欲結廬於其中冀時得遊禮耳罷官乃絕
粒咽氣數月稍覺神旺身輕入洞屋誓不復返初行三
二十里或寬廣明朗或幽暗泥黑捫壁俯行經三五日
忽坦然平闊峭崖倚空直拔萬仞下有嵌室可坐數百
人石牀案几儼若有人居之案上古經一軸未敢遂取
稽首載拜言曰下土賤臣形濁氣穢輒慕長生之道幸
入洞天仰窺靈府是萬劫良會今觀上天遺跡玉案玄

經不敢輒取願真仙鑒祐許塵目一披篇卷則受罔極之恩良久叩頭乞報應之兆忽有一人坐於案側曰子其志乎緱氏仙裔聿能好道可以名列青簡矣吾東極真人子之同姓也此黃庭寶經吾之所註使授於子復贈以桃核數斗曰此食之者白日飛行此核磨而服之不唯愈疾亦可延算子雖有志未可居此二十年期於茲山矣勉而勤之得道也言訖不復見瑜亦不敢久住攜桃核與經而歸磨服桃核身康無疾顏狀益少人間

因有傳寫東極真人所註黃庭經本矣

出仙傳拾遺

王子芝

王子芝字仙苗自云河南緱氏人常遊京洛間耆老云五十年來見之狀貌恒如四十許人莫知其甲子也好養氣而嗜酒故蒲帥琅琊公重盈作鎮之初年仙苗居於紫極宮王令待之甚厚又聞其嗜酒日以三榼餉之間日仙苗出遇一樵者荷擔於宮門貌非常意甚異焉因市其薪厚償厥直樵者得金亦不讓而去子芝潛令

人躡其後以伺之樵者徑趨酒肆盡飲以歸他日復來
子芝謂曰知子好酒吾有中令所餉醇醪償子薪價可
乎曰可迺飲之數盃因謂子芝是酒佳矣然殊不及解
縣石氏之醞也余適自彼來恨向者無侶不果盡於斯
酌子芝因降階執手與之擁鑪祈於樵者曰石氏芳醪
可致否樵者領之因命丹筆書一符置於火上煙未絕
有一小豎立于前樵者勅之爾領尊師之僕挈此二榼
但往石家取酒吾待與尊師一醉時既昏夜門已扃禁

小豎謂芝僕曰可閉其目因搭其頭人與酒壺偕出自
門隙已及解縣攜酒而還因與子芝共傾焉其甘醇郁
烈非世所儔中宵樵者謂子芝曰已醉矣余召一客伴
子飲可乎子芝曰諾復書一朱符置火上瞬息聞異香
滿室有一人來堂堂美鬚眉拖紫秉簡揖樵者而坐引
滿兩巡二壺且竭樵者燒一鐵筋以授紫衣者云可去
時東方明矣遂各執別樵者因謂子芝曰識向來人否
少頃可造河瀆廟視之子芝送樵者訖因過廟所覩夜

來共飲者迺神耳鐵筋之驗宛然趙君郎中時在幕府
目驗此事弘文館校書郎蘇悅亦寓於中條甚熟蹤跡
其後子芝再遇樵仙別傳修鍊之訣且為地仙矣

出神
仙感

遇傳

劉商

劉商彭城人也家於長安少好學強記精思攻文有胡
笳十八拍盛行於世兒童婦女咸悉誦之進士擢第歷
臺省為郎性耽道術逢道士即師資之鍊丹服氣靡不

勤切每歎光陰甚促筋骸漸衰朝馳暮止但自勞苦浮榮世宦何益於已古賢皆墮官以求道多得度世幸畢婚嫁不為俗累豈劣於許遠遊哉由是以病免官道服東遊入廣陵於城街逢一道士方賣藥聚衆極多所賣藥人言頗有靈效衆中間商目之相異乃罷藥攜手登樓以酒為勸道士所談自秦漢歷代事皆如目覩商驚異師敬之復言神仙道術不可得也及暮商歸僑止道士下樓閃然不見商益訝之商翌日又於城街訪之道

士仍賣藥見商愈喜復挈上酒樓劇談勸醉出一小藥囊贈商并戲吟曰無事到揚州相攜上酒樓藥囊為贈別千載更何求商記其吟暮乃別去後商累尋之不復見也乃開囊視重紙裹一葫蘆子得九粒藥如麻栗依道士口訣吞之頓覺神爽不饑身輕飄然過江遊茅山久之復往宜興張公洞當遊之時愛罨畫溪之景遂於胡父渚葺居隱於山中近樵者猶見之我劉郎中也而莫知所止已為地仙矣

出續仙傳

太平廣記

太平廣記

乙一

太平廣記卷四十六

欽定四庫全書

太平廣記卷四十七

神仙四十七

唐憲宗皇帝 李球

宋玄白

許棲巖 韋善俊

唐憲宗皇帝

唐憲宗好神仙不死之術元和五年內給事張惟則自新羅國迴云於海中泊山島間忽聞雞犬鳴吠似有烟

火遂乘月閒步約及一二里則見花木樓臺殿閣金戶
銀關其中有數公子戴章甫冠衣紫霞衣吟嘯自若惟
則知其異遂請謁公子曰汝何所從來惟則具言其故
公子曰唐皇帝乃吾友也當汝旋去願為傳語俄而命
一青衣捧出金龜印以授惟則乃置之於寶匣復謂惟
則曰致意皇帝惟則遂持之還舟中迴顧舊路悉無踪
跡金龜印長五寸上負黃金玉印面方一寸八分其篆
曰鳳芝龍木受命無疆惟則至京師即具以事上進憲

宗曰朕前生豈非仙人乎及覽金龜印歎異良久但不
能諭其文耳因緘以紫泥玉鐐置於帳內其後往往見
五色光可長丈餘是月寢殿前連理樹上生靈芝二株
宛如龍鳳憲宗因歎曰鳳芝龍木寧非此兆乎時又有
處士伊祁玄解纈髮童顏氣息香潔常乘一黃牝馬繞
三尺高不啮芻粟但飲醇酎不施韁轡惟以青羶藉其
背常遊歷青兗間若與人欵曲話千百年事皆如目擊
帝知其異人遂令密詔入宮內館於九華之室設紫焚

之席飲龍膏之酒紫莖席類莖葉光軟香靜夏涼冬溫
龍膏酒黑如純漆飲之令人神爽此本烏弋山離國所
獻也烏弋山離國已見班固西京傳也帝每日親自訪
問頗加敬仰而玄解魯朴未嘗嫻人臣禮帝因問之曰
先生春秋高而顏色不老何也玄解曰臣家于海上種
靈草食之故得然也即於衣間出三等藥實為帝種於
殿前一曰雙麟芝二曰六合葵三曰萬根藤雙麟芝色
褐一莖兩穗穗形如麟頭尾悉具其中有子如瑟瑟焉

六合葵色紅而葉類於莢葵始生六莖其上合為一株
共生十二葉內出二十四花花如桃花而一朶千葉一
葉六影其成實如相思子萬根藤子一子而生萬根枝
葉皆碧鈎連盤屈蔭一畝其狀類芍藥而葉色殷紅細
如絲髮可長五六寸一朶之內不啻千葉亦謂之絳心
藤靈草既成人乃莫見而玄解請帝自采餌之頗覺神
驗由是益加禮重焉遇西域有進美玉者一圓一方徑
各五寸光彩凝冷可鑒毛髮時玄解方坐於帝前熟視

之曰此一龍玉也一虎玉也驚而問曰何謂龍玉虎玉也玄解曰圓者龍也生於水中為龍所寶若投之於水必有霓虹出焉方者虎也生於巖谷為虎所寶若以虎毛拂之紫光迸逸而百獸攝服帝異其言遂令嘗之各如所說詢得玉之由使人曰一自漁者得一自獵者獲帝因命取龍虎二玉以錦囊盛之於內府玄解將還東海亟請於帝未許之遇宮中刻木作海上三山絲繪華麗間以珠玉帝元日與玄解觀之帝指蓬萊曰若非上

仙朕無由得及是境立解笑曰三島咫尺誰曰難及臣
雖無能試為陛下一遊以探物象妍醜即躡體於空中
漸覺微小俄而入於金銀闕內左側連聲呼之竟不復
有所見帝追思歎恨近成羸疹因號其山為藏真島每
詰旦於島前焚鳳腦香以崇禮敬後旬日青州奏云立
解乘黃牝馬過海矣

李球

李球者燕人也寶曆二年與其友劉生遊五臺山山有

風穴遊人稍或誼呼及投物擊觸即大風震發揭屋拔木必為物害故登山之時互相戒勅不敢觸球至穴口戲投巨石於穴中良久石聲方絕果有奔風迅發有一木如柱隨風飛出球性軒悍無所顧忌遂力扳其木却墜入穴中球為木所載亦不得出良久至地見一人形如獅子而人語引球入洞中齋內見二道士奕碁道士見球喜問球所修之道球素不知通修行之事默然無以為對二仙責引者曰吾至道之要當授有骨相之士

習道之人汝何妄引凡庸入吾仙府耶速引去之因以一杯水遺令飲謂之曰汝雖凡流得覩吾洞府踐吾真境將亦有少道分矣所恨素不習道不可語汝修行之要耳但去苟有希生之心出世之志他日可復來也飲此神漿亦延年壽矣球飲水拜謝訖引者將球至向來洞側示以別路曰此山道家紫府洞也五峰之上皆籍四海奇寶以鎮峰頂亦如茅山洞鎮以安息金墉城之寶春山雜玉環水香瓊以固上真之宅此山東峰有離

岳火球西峰有麗農瑤室南峰有洞光珠樹北峰有玉
澗瓊芝中峰有自明之金環光之壁每積陰將散久暑
將雨即衆寶交光照灼巖嶺春曉秋旦則九色之氣屬
天光輝爍乎雲表太帝命韓司少卿東方君與紫府先
生統六年仙寮神王力士以鎮於此故謂神仙之府也
洞有三門一徑西通崑崙一徑出北巖之下一向來風
穴是洞之端門也皆有龍蛇守之先生有勅曰有巨石
投於洞門中吾柱者是世間將有得道之人受事於此

即使我引進我亦久遠學道當證仙品而積功之外口業不除以宿功所廕得守此洞穴之口後三百年亦當超昇矣以口業之故假此形耳我守先生之命適聞投石中柱依教引子誠不知子戲投石耳然數百年來投石者少亦未嘗中柱神仙之宮不易一至于亦將有所得於玄妙之津矣此有北巖之徑可使子得速還人間因衣帶解藥三丸貫一槁枝之末謂球曰路側如見異物以藥指之不為害此藥食之可以無病球持此藥行

於洞中黑處藥有光如火有數巨蛇張口向球以藥指之伏不敢動因出洞門門外古樹半朽洞欲堙塞球摧壤土朽樹久方得出已在寺門之外矣先是劉生既失球子方執誣劉生疑害其父欲訟於官寺有大齋未得便去既見球還衆皆忻喜具話所見之異因以三九藥與劉及子各餌一丸乾符中進士司徒鐵與球相別三十餘年別時球年六十鬚已垂白於河東見球年九十餘容狀如三十許人話所遇之事云服藥至今老而復

壯性不食其子亦如三十歲許銳志修道與其子入王

屋山去

出仙傳
拾遺

宋玄白

宋玄白不知何許人也為道士身長七尺餘眉目如畫
端美肥白言談秀麗人見皆愛之有道術多遊名山自茅
山出潤州希玄觀復遊括蒼仙都辟穀服氣然嗜酒或
食彘肉五斤以蒜齏一盆手撮肉吃畢即飲酒二斗用
一白梅人有求得其一片蒜食之者言不作蒜氣味有

如異香終日在齒舌間香不歇人間得蒜食者頗多而
畢身無病壽皆八九十玄白到處住則以金帛求置三
二美妾行則捨之人皆以為有老彭補腦還元之術又
遊越州適大旱方暴厄禁龍以祈雨涉旬亢陽愈甚玄
白見之以為凡所降雨須俟天命非上奏無以致之遂
於所止玄真觀焚香上祝經夕大澍雨告足越人極神
異之復南遊到撫州又逢天旱祈禱有道士知玄白能
致雨州人請之遽作術飛釘城隍神雙目刺史韋德隣

惟其貯婦女復釘城隍神此類狂也將加責辱健步輩欲
向之手脚皆不能動悉自仆倒枷杖亦自摧折玄白笑
謂德隣曰使君干忤劉根欲見誅罰祖禰耶德隣方懼
祈謝須臾致雨禮而遣之其靈術屢施不可備錄後之
南城縣白日上昇而去

出續神
仙傳

許棲巖

許棲巖岐陽人也舉進士習業於昊天觀每晨夕必瞻
仰真像朝祝靈仙以希長生之福時南康韋臯太尉鎮

蜀延接賓客遠近慕義遊蜀者甚多巖將為入蜀之計
欲市一馬而力不甚豐自入西市訪之有蕃人牽一馬
瘦削而價不高因市之而歸以其將遠涉道途日加芻
秣而肌膚益削疑其不達前所試詣卜肆筮之得乾卦
九五道流曰此龍馬也宜善寶之洎登蜀道危棧棲巖
與馬俱墜岸下積葉承之幸無所損仰不見頂四面路
絕計無所出乃解鞍去衛任馬所往於槁葉中得粟如
拳棲巖食之亦不饑矣尋其崖下見一洞穴行而乘之

或下或高約十餘里忽爾及平川花木秀異池沼澄澈
有一道士臥於石上二女侍之巖進而求見問二玉女
云是太乙真君巖即以行止告玉女玉女憫之白於真
君曰爾於人世亦好道乎曰讀莊老黃庭而已曰三景
之中得何句也答曰老子云其精甚真莊子云息之以
踵黃庭云但思以卻壽無窮笑曰去道近矣可教也命
坐酌小盃以飲之曰此石髓也嵇康不能得近爾得之
矣乃邀入別室有道士云是潁陽尊師為真君布算言

今夕當東遊十萬里巖孰視之乃卜馬道士也是夕巖
與潁陽從太乙君登東海西龍山石橋之上以赴羣真
之會座內仙客有東黃君見棲巖喜曰許長史孫也有
仙相矣及明復從太乙君歸太白洞中居半月思家求
還太乙曰汝飲石髓已壽千歲無輸泄無荒淫復此來
再相見也以所乘馬送之將行謂曰此馬吾洞中龍也
以作怒傷稼謫其負荷子有仙骨故得值之不然此太
白洞天瑤華上宮何由而至也到人間放之渭曲任其

所適勿復留之既別逡巡已達虢縣則無復故居矣問
鄉人年代已六十年出洞時二玉女託買虢縣田婆針
乃市之杖繫馬鞍上解鞍放之化龍而去棲巖幼在鄉
里已見田婆至此惟田婆容狀如舊蓋亦仙人也棲巖
大中末年復入太白山去

出傳
奇

韋善俊

韋善俊者京兆杜陵人也訪道周遊遍尋名岳遇神仙
授三皇檄召之文得神化之道或靜棲林野或醉臥道

途常攜一犬號之曰烏龍所至之處必分已食以飼之
犬復病疥毛盡禿落無不嫌惡之其兄為僧久居嵩寺
最為長老善俊將欲昇天忽謂人曰我有少債未償耳
遂入山見兄衆僧以師長之弟多年忽歸彌加敬奉每
昇堂齋食即牽犬於其側分食與之衆既惡之白於長
老長老怒召而責之笞擊十數遣出寺善俊禮謝曰某
宿債已還此去不復來矣更乞一浴然後乃去許之及
浴移時牽犬而去犬已長六七尺行至殿前犬化為龍

長數十丈善俊乘龍昇天擎其殿角蹤跡猶在

出仙傳拾遺

太平廣記卷四十七

欽定四庫全書

太平廣記卷四十八

神仙四十八

李吉甫

李紳

白樂天

軒轅先生

李元

韋卿材

李吉甫

李太師吉甫在淮南州境廣疫李公不飲酒不聽樂會
有制使至不得已而張筵憂慘見色醺合謂諸客曰弊

境疾厲亡歿相踵諸賢傑有何術可以見救下坐有一
秀才起應曰某近離楚州有王鍊師自云從太白山來
濟拔江淮疾病休糧服氣神骨甚清得力者已衆李公
大喜延於上坐復問之便令作書并手札遣人馬往迎
旬日至館於州宅稱弟子以祈之王生曰相公但令於
市内多聚龜殼大鑊巨甌病者悉集無慮不瘥李公遽
遣備之既得王生往令濃煎重者恣飲之輕者稍減既
汗皆愈李公喜既與之金帛不受不食寡言唯從事故

山南節帥相國王公起王生見必坐笑以語若舊相識
李公因令王公邀至宅宿問其所欲言便行深夜從
容曰判官有仙骨學道必白日上昇如何王公無言良
久曰此是塵俗態縈縛耳若住人世官職無不得者王
公請以凡事之又曰本師為在白鹿與判官亦當家能
與某同往一候謁否意復持疑曰仙公何名曰師不敢
言索筆書鶴字王生從此不知所詣王公果富貴

出逸史

李紳

故淮海節度使李紳少時與二友同止華陰西山舍一
夕林叟有賽神者來邀適有頭疼之疾不往二友赴焉
夜分雷雨甚紳入止深室忽聞堂前有人祈懇之聲徐
起窺簾乃見一老叟眉鬚皓然坐東床上青童一人執
香爐拱立於後紳訝之心知其異人也具衫履出拜老
父曰年小識我乎曰小子未嘗拜覩老父曰我是唐若
山也亦聞吾名乎曰嘗於仙籍見之老父曰吾處北海
久矣今夕南海羣仙會羅浮山將往焉及此遇華山龍

聞散雨滿空吾服藥者不欲令霑服故憇此耳子非李
紳子對曰某姓李不名紳老父曰子合名紳在籍矣能
隨我一遊羅浮乎紳曰平生之願也老父喜有頃風雨
霽青童告可行叟乃袖出一簡若笏形縱拽之長丈餘
橫拽之闊數尺緣卷底坳宛若舟形父登居其前令紳
居其中青童坐其後叟戒紳曰速閉目慎勿偷視紳則
閉目但覺風濤洶湧似泛江海逡巡舟止叟曰開視可
也已在山前樓殿參差藹若天外簫管之聲寥亮雲

中端雅士十餘人喜迎叟指紳曰何人也叟曰李紳耳
羣士曰異哉公垂果能來人世凡濁苦海非淺自非名
繫仙錄何路得來叟令紳遍拜之羣士曰子能我從乎
紳曰紳未立家不獲辭恐若黃初平貽憂於兄弟未言
間羣士已知子念歸不當入此居也子雖仙錄有名而
俗塵尚重此生猶沉幻界耳美名崇官外皆得之守正
修靜來生既冠遂居此矣勉之勉之紳復遍拜叟歸辭
訖遂合目有一物若驢狀近身乘之又覺走於風濤之

上項之悶甚思見其異纔開目已墮地而夫所乘者仰視
星漢近五更矣似在華山北徐行數里逢旅舍乃羅浮
店也去所止二十餘里緩步而歸明日二友與僕夫方
奔訪覓之相逢大喜問所往詐云夜獨居偶為妖狐所
惑隨造其居將曙悟而歸耳自是改名紳字公垂果登
甲科翰苑歷任郡守兼將相之重

出續玄
恠錄

白樂天

唐會昌元年李師稷中丞為浙東觀察使有商客遭風

飄蕩不知所止月餘至一大山瑞雲奇花白鶴異樹盡
非人間所覩山側有人迎問曰安得至此具言之令維
舟上岸云須謁天師遂引至一處若大寺觀通一道入
道士鬚眉悉白侍衛數十坐大殿上與語曰汝中國人
茲地有緣方得一到此蓬萊山也既至莫要看否遣左
右引於宮內遊觀玉臺翠樹光彩奪目院宇數十皆有
名號至一院扃鑰甚嚴因窺之衆花滿庭堂有裊褥焚
香階下客問之答曰此是白樂天院樂天在中國未來

耳乃潛記之遂別之歸旬日至越具白廉使李公盡錄以報白公先是白公平生唯修上垂業及覽李公所報乃自為詩二首以記其事及答李浙東云近有人從海上回海山深處見樓臺中有仙籠開一室皆言此待樂天來又曰吾學空門不學仙恐君此語是虛傳海山不
是吾歸處歸即應歸兜率天然白公脫屣煙埃投棄軒冕與夫昧昧者固不同也安知非謫仙哉

出逸史

軒轅先生

羅浮先生軒轅集年過數百顏色不衰立於床前則髮垂至地坐於閤室則目光可長數尺每採藥於深巖峻谷則有毒龍猛虎護衛或民家具齋飯邀之雖一日百處無不分體而至若與人飲即袖出一壺繞容三二升縱賓客滿座而傾之彌日不竭或人命飲則百斗不醉夜則垂髮於盆中其酒漑漑而出麴藥之香輒無減耗與獵人同羣有非朋遊者俄而見十數儀貌無所間別或飛朱篆於空中則可屈千里病者以布巾拭之無不

應手而愈唐宣宗召入內廷遇之甚厚因問曰長生之道可致乎集曰輟聲色去滋味哀樂如一德施無偏自然與天地合德日月齊明致堯舜禹湯之道而長生久視之術何足難哉又問先生道孰愈於張果曰臣不知其他但少於果耳及退上遣嬪御取金盆覆白鵲以嘗之而集方休於所舍忽謂其中貴人曰皇帝安能更令老夫射覆乎中貴皆不諭其言于時宣宗召令速至而纔及玉階謂曰盆下白鵲宜早放之宣宗笑曰先生早

已知矣坐於御榻前宣宗命宮中人傳湯茶有笑集貌
古布素者而續髮朱唇年始二八須臾變成老嫗雞皮
鮐背鬢髮如絲於宣宗前涕泗交下宣宗知宮人之過
遂令謝先生而貌復故宣宗因話京師無豈寇荔枝花
俄頃二花皆連葉各近百數鮮明芳潔如纔折下更嘗
賜柑子曰臣山下者有味逾於此宣宗曰朕無得矣集
遂取御前碧玉甌以寶盤覆之俄而徹盤即柑子至矣
芬馥滿殿其狀甚大宣宗食之歎其甘美無匹更問曰

朕得幾年作天子即把筆書曰四十年但十字跳脚宣
宗笑曰朕安敢望四十年乎及晏駕乃十四年也初辭
歸山自長安至江陵於布囊中探金錢以施貧者約數
十萬中使從之莫知其故忽然亡其所在使臣惶恐不
自安後數日南海奏先生歸羅浮山矣

出杜陽
雜編

李元

李元諫議嘗隱於嵩山茅舍冬寒當戶熾火有老人戴
大帽子直入炙脚良久問李公曰頗能同去否知君有

志因自言某秦時閩人避禍得道乃去帽鬚髯偉甚曰
此皆山中所長也李公思之良久乃答曰家事未了更
數日得否老人揭然而起曰公意如此遂出門徑去李
公牽衣媿謝不可暫止明日尋訪悉無其跡

出逸史

韋卿材

盧元公奉道暇日與賓友語言必及神仙之事云某有
表弟韋卿材太和中選授江淮縣宰赴任出京日親朋
相送離灞澹時已曛暮矣行一二十里外覺道路漸異

非常日經過之處既望其中有燈燭熒煌之狀林木葱
蒨似非人間頃之有謁於馬前者如州縣候吏問韋曰
自何至此此非俗世俄頃復有一人至謂前謁者曰既
至矣則須速報上公韋問曰上公何品秩也吏亦不對
却走而去逡巡遽聲連呼曰上公屈韋下馬趨走入門
則峻宇雕牆重廊複閣侍衛嚴肅擬於王侯見一人年
可四十歲平上幘衣素服遙謂韋曰上堦韋拜而上命
坐慰勞久之亦無肴酒湯菓之設徐謂韋曰某因世亂

百家相糺竄避於此衆推為長強謂之上公爾來數百年亦無號令約束但任之自然而已公得至此塵俗之幸也不可久留當宜速去命取絹十疋贈之韋出門上馬却尋舊路迴望亦無所見矣半夜朧月信足而行至明則已在官路逆旅暫歇詢之於人且無能知者取絹視之光白可鑑韋遂裹却入京詣親友具述其事因以絹分遺親愛韋云約其處乃在驪山藍田之間蓋地仙也

出尚書
故實

太平廣記卷四十八

欽定四庫全書

太平廣記卷四十九

神仙四十九

潘尊師

李賀

張及甫

鄭冊

陳惠虛

溫京兆

潘尊師

嵩山道士潘尊師名法正蓋高道者也唐開元中謂弟子司馬鍊師曰陶弘景為嵩山伯於今百年矣頃自上

帝求替帝令舉所知以代弘景舉余文籍已定吾行不
得久住人間矣不數日乃屍解而去其後登封縣嵩陽
觀西有龍湫居人張迪者以陰器於湫上洗濯俄為人
所攝行可數里至一甲第門前悉是羣龍入門十餘步
有大廳事見法正當廳而坐手持朱筆理書問迪曰汝
是觀側人亦識我否曰識是潘尊師法正問迪何以汚
羣龍室迪載拜謝罪又問汝識司馬道士否迪曰識之
法正云今放汝還遂持几上白羽扇謂迪曰為我寄司

馬道士何不來而戀世間樂耶使人送迎出水上迎見其屍臥在岸上心惡之奄然如夢遂活司馬道士見羽扇悲涕曰此吾師平素所執亡時以置棺中今君持來明吾師見在不虛也乃深入山數年而卒

出廣異記

李賀

隴西李賀字長吉唐鄭王之孫稚而能文尤善樂府詞句意新語麗當時工於詞者莫敢與賀齒由是名聞天下以父名晉肅子故不得舉進士卒於太常官年二十

四其先夫人鄭氏念其子深及賀卒夫人哀不自解一夕夢賀來如平生時白夫人曰某幸得為夫人子而夫人念某且深故從小奉親命能詩書為文章所以然者非止求一位而自飾也且欲大門族上報夫人恩豈期一日死不得奉晨夕之養得非天哉然某雖死非死也乃上帝命夫人訊其事賀曰上帝神仙之居也近者遷都于月圃構新宮命曰白瑤以某榮於詞故召某與文士數輩共為新宮記帝又作凝虛殿使某輩纂樂章今

為神仙中人甚樂願夫人無以為念既而告去夫人寤甚異其夢自是哀少解

出宣室志

張及甫

唐元和中青州屬縣有張及甫陳幼霞同居為學一夜俱夢至一處見道士數人令及甫等書碑題云蒼龍溪主歐陽某撰太皇真訣字作篆文稍異於常及甫等記得四句云云昔乘魚車今履瑞雲躅空仰途綺錯輪囷後題云五雲書閣吏陳幼霞張及甫至曉二人共言悉

同出逸史

鄭冊

温州刺史鄭冊好黃老之術常密為之因疾自見女仙
三百餘人云迎公乃命設饌焚香禮拜又邀兄冉同於
空中禮拜少頃命燭五炬引兄冉與左右人皆無所見
明日天明又陽官來催曰員外祿運見終今請速登駕
又命酒果祭之云員外受職六月朔視事至午時當奉
迎先是公與天台道士金柔為方外之友至其日食時

造省公公說前事即與柔共入淨堂中禮拜又云受牒
身一道公空中引手接之又自開封以右手點筆空押
之自書六字謂使者曰以有前約的不逾時便言時至
揖金柔向按不令閉卻四門又催家人阿鹿下飯先令
作蒸餅猶熟唯六七碟脯及酒而已遣兄冉出外家人
排床七隻云六押衙來迎矣公命坐如再三辭讓之狀
公跪拜再三便低頭不起家人走報兄冉及室人少時
而逝形體柔軟顏色不改按真誥云具有陰德及好道

信仙者此例品格蓋多觀鄭公潛化之跡虛無之位其

昭昭乎

出原
化記

陳惠虛

陳惠虛者江東人也為僧居天台國清寺曾與同侶遊
山戲過石橋水峻苔滑懸流萬仞下不見底衆皆股慄
不行惠虛獨超然而過徑上石壁至夕不迴羣侶皆舍
去惠虛至石壁外微有小徑稍稍平闊遂及宮闕花卉
萬叢不可目識臺閣連雲十里許見其門題額曰會真

府左門額曰金庭宮右額曰桐栢三門相向鼎峙皆有
金樓玉窻高百丈入其右內之西又一高樓黃門題曰
右弼宮周顧數千間屈曲相通瑤階玉陛流渠激水處
處華麗殆欲忘歸而了無人跡又入一院見青童五六
人相顧笑語而去再三問之應曰汝問張老須臾迴顧
見一叟挾杖持花而來訝曰汝凡俗人何忽至此惠虛
曰常聞過石橋即有羅漢寺人世時聞鐘聲故來尋訪
干僧幸會得至此境不知羅漢何在張老曰此真仙之

福庭天帝之下府號曰金庭不死之鄉養真之靈境週
迴百六十里神仙右弼桐栢上真王君主之列仙三千
人仙王力士天童玉女各萬人為小都會之所太上一
年三降此宮校定天下學道之人功行品第神仙所都
非羅漢之所也王君者周靈王之子瑤丘先生之弟子
位為上真矣惠虛曰神仙可學之否張老曰積功累德
肉身昇天在於立志堅久耳汝得見此福庭亦是有可
學之望也又問曰學仙以何門而入張老曰內以保神

鍊氣外以服餌丹華變化為仙神丹之力也汝不可久
住上真適遊東海騎衛若還恐有咨責因引之使出門
行十餘步已在國清矣惠虛自此慕道好丹石雖衣敝
履穿不以為陋聞有鑪火方術之士不遠而詣之丹石
所費固亦多矣晚居終南山捧日寺年漸衰老其心愈
切寢疾月餘羸憊且甚一日暴雨後有老叟負藥囊入
寺大呼曰賣大還丹繞廊數迴衆僧皆笑之乃指病僧
惠虛之門謂老叟曰此叟頗好還丹售之可也老叟欣

然詣之惠虛曰還丹知是靈藥一劑幾錢叟曰隨力可致耳惠虛曰老病沉困床枕餘月昨僧次到自行不得托隣僧代齋得贖錢少許可致藥否叟取其錢而留藥數丸教其所服之法惠虛便吞之老叟乃去衆僧相率來問言已買得還丹吞服之矣頃間久疾都愈遙止衆僧曰勿前覺有臭吾疾愈矣但要新衣一兩事耳跳身起床勢若飛躍衆驚歎之有新衣與之者取而着焉忽飛殿上從容久之揮手相別冉冉昇天而去時大中十

二年戊寅歲是年歸桐栢觀與道流話得道之由云今
在桐栢宮中賣藥老叟將是張老耳言訖隱去

出仙傳
拾遺

溫京兆

溫璋唐咸通壬辰尹正天府性黷貨敢殺人亦畏其嚴
殘不犯由是治有能名舊制京兆尹之出靜通衢閉里
門有窾其前道者立杖殺之是秋溫公出自天街將南
抵五門呵喝風生有黃冠老而且偃敝衣叟杖將橫絕
其間騶人呵不能止溫公命捽來答背二十振袖而去

若無苦者溫異之呼老街吏令潛而覘之有何言復命
黃冠扣之既而跡之迨暮過蘭陵里南入小巷中有衝
門止處也吏隨入關有黃冠數人出謁甚謹且曰真君
何遲也答曰為凶人所辱可具湯水黃冠前引雙鬟青
童從而入吏亦隨之過數門堂宇華麗修竹夾道擬王
公之甲第未及庭真君顧曰何得有俗物氣黃冠爭出
索之吏無所隱乃為所錄見真君吏叩頭拜伏具述溫
意真君盛怒曰酷吏不知禍將覆族死且將至猶敢肆

毒於人罪在無赦叱街吏令去吏拜謝了趨出遂走詣
府請見溫時則深夜矣溫聞吏至驚起於便室召之吏
悉陳所見溫大嗟惋明日將暮召吏引之街鼓既絕溫
微服與吏同詣黃冠所居至明吏款扉應門者問誰曰
京兆溫尚書來謁真君既闢重閨吏先入拜仍白曰京
兆尹溫璋溫趨入拜真君踞坐堂上戴遠遊冠衣九霞
之衣色貌甚峻溫伏而叙曰某任愍浩穰權唯震肅若
稍畏懦則損威聲昨日不謂凌迫大仙自貽罪戾故來

首服幸賜矜哀真君責曰君忍殺立名專利不厭禍將
行及猶逞兇威溫拜首求哀者數四而真君終蓄怒不
許少頃有黃冠自東序來拱立於真君側乃跪啓曰尹
雖得罪亦天子亞卿况真君洞其職所統宜少降禮言
訖真君令黃冠揖溫昇堂別設小榻令坐命酒數行而
真君怒色不解黃冠復啓曰尹之忤犯宥誠難然則
真君變服塵遊俗士馬識白龍魚服見困豫且審思之
真君悄然良久曰恕爾家族此間亦非淹久之所溫遂

起於庭中拜謝而去與街吏疾行至府動曉鐘矣雖語
親近亦秘不令言明年同昌主薨懿皇傷念不已忿藥
石之不徵也醫韓宗紹等四家詔府窮竟將誅之而溫
鬻獄緩刑納宗紹等金帶及餘貨凡數千萬事覺飲醜
而死

出三水
小牘

太平廣記卷四十九

欽定四庫全書

太平廣記卷五十

神仙五十

嵩岳嫁女

裴航

嵩岳嫁女

三禮田璆者甚有文通熟羣書與其友鄧韶博學相類
皆以人昧不能彰其明家于洛陽元和癸巳歲中秋望
夕携觴晚出建春門期望月于韶別墅行二三里遇韶

亦携觴自東來駐馬道周末決所適有二書生乘驄復
出建春門揖璆韶曰二君子挈榼得非求今夕望月地
乎某敝莊水竹臺榭名聞洛下東南去此三二里儻能
迂轡冀展傾蓋之分耳璆韶甚愜所望乃從而往問其
姓氏多他語對行數里桂輪已昇至一車門始入甚荒
涼又行數百步有異香迎前而來則豁然真境矣泉瀑
交流松桂夾道竒花異草照燭如晝好鳥騰翥風和月瑩
璆韶請疾馬飛觴書生曰足下榼中厥味何如璆韶曰

乾和五醎雖上清醒醐計不加此味也書生曰某有瑞
露之酒釀於百花之中不知與足下五醎孰愈耳謂小
童曰折燭夜一花傾與二君子嘗其花四出而深紅圓
如小瓶徑三寸餘綠葉形類盃觸之有餘韻小童折花
至於竹葉中凡飛數巡其味甘香不可比狀飲訖又東
南行數里至一門書生揖二客下馬觴以燭夜花中之
餘賚諸從者飲一盃皆大醉各止於戶外乃引客入則
有鸞鶴數十騰舞來迎步而前花轉繁酒味尤美其百

花皆芳香壓枝於路傍凡歷池館堂榭率皆陳設盤筵
若有所待但不留瓊韶坐瓊韶飲多行又甚倦請暫憩
盤筵書生曰坐亦何難但不利於君耳瓊韶詰其由曰
今夕中天羣仙會於茲岳籍君神魄不離腥羶請以知
禮導昇降此皆諸仙位坐不宜塵觸耳言訖見直北花
燭亘天簫韶沸空駐雲母雙車於金堤之上設水晶方
盤於瑤幄之內羣仙方奏霓裳羽衣曲書生前進命瓊
韶拜夫人夫人褰帷笑曰下域之人而能知禮然服食

之氣猶然射人不可近他貴壻可各賜薰髓酒一盃
璆飲訖覺肌膚溫潤稍異常人呼吸皆異香氣夫人問
左右誰人召來曰衛符卿李八百夫人曰便令此二童
接待於是二童引璆韶於神仙之後縱目璆問曰相者
誰曰劉綱侍者誰曰茅盈東鄰女彈箏擊筑者誰曰麻
姑謝自然幄中座者誰曰西王母俄有一人駕鶴而來
王母曰夕望有玉女問曰禮生來未於是引璆韶進立
於碧玉堂下左劉君笑曰適緣蓮花峰士奏章事須決

遣尚多未來客何言又望乎王母曰奏章事者有何所
為曰浮梁縣令求延年矣以其人因賄賂履官以苛虐
為政生情於案牘忠恕之道蔑聞唯雜於貨財巧偽之
計更作自貽覆餗以促餘齡但以蓮花峰叟狗從於人
奏章甚懇特紆死限量延五年璆問劉君誰曰漢朝天
子續有一人駕黃龍戴黃旂導以笙歌從以嬪嬙及瑤
幄而下王母復問曰李君來何遲曰為勅龍神設水旱
之計作彌淮蔡以殲妖逆漢主曰柰百姓何曰上帝亦

有此問予一表斷其惑矣曰可得聞乎曰不能悉記略
舉大綱耳其表云某縣某克構丕華德洽兆庶臨履深
薄匪敢怠荒不勞師車平中夏巴蜀之孽不費天府掃
東吳上黨之妖九有已見其廓清一方尚屯其氛稷伏
以虺蜴肆毒痛於淮蔡豺狼尚猜其口喙螻蟻猶固其
封疆若遣時豐人安是稔羣醜但使年饑厲作必搖人
心如此倒戈而攻可以席捲禍三州之逆黨所損至微
安六合之疾眊其利則厚伏請神龍施水厲鬼行災由

此天誅以資戰力漢主曰表至嘉帝既允許可以前賀
誅鋤矣書生謂璆韶此開元天寶太平之主也未頃聞
簫韶自空而來執絳節者前唱言穆天子來奏樂羣仙
皆起王母避位拜迎二主降階入幄環坐而飲王母曰
何不拉取老軒轅來曰他今夕主張月宮之醮非不勤
請耳王母又曰瑤池一別後陵谷幾遷移向來觀洛陽
東城已丘墟矣定鼎門西路忽焉復新市朝云名利如
舊可以悲嘆耳穆王把酒請王母歌以珊瑚鈎擊盤而

歌曰勸君酒為君悲且吟自從頻見市朝改無復瑤池宴樂心王母持盃穆天子歌曰奉君酒休歎市朝非早知無復瑤池興悔駕驊騮草草歸歌竟王母話瑤池舊事乃重歌一章云八馬迴乘汗漫風猶思往事憇昭宮宴移南圃情方洽樂奏鈞天曲未終斜漢露凝殘月冷流霞盃泛曙光紅崑崙回首不知處疑是酒酣魂夢中王母酬穆天子歌曰一曲笙歌瑤水濱曾留逸足駐征輪人間甲子週千歲靈境盃觴初一巡玉兔銀河終

不夜竒花好樹鎮長春
悄知碧海饒詞句
歌向俗流疑
悞人酒至漢武帝
王母又歌曰
珠露金風下界秋
漢家
陵樹冷脩脩
當時不得仙桃力
尋作浮塵飄隴頭
漢主
上王母酒曰
五十餘年四海清
自親丹竈得長生
若言
盡是仙桃力
看取神仙簿
上名帝把酒曰
吾聞丁令威
能歌命左右
召來令威至
帝又遣子晉吹笙以和歌
曰
月照驪山露泣花
似悲先帝早昇遐
至今猶有長生鹿
時遶溫泉望翠華
帝持盃久之
王母曰
應須召葉靜能

來唱一曲當時事靜能續至跪獻帝酒復歌曰幽薊烟
塵別九重貴妃湯殿罷歌鐘中宵扈從無全仗大駕蒼黃
發六龍粧匣尚留金翡翠暖池猶浸玉芙蓉荆榛一閉
朝元路唯有悲風吹晚松歌竟帝悽慘良久諸仙亦慘
然於是黃龍持盃亦於車前再拜祝曰上清神女玉京
仙郎樂此今夕和鳴鳳鳳凰和鳴將翔將翔與天齊
休慶流無央仙郎即以鮫綃五千疋海人文錦三千端
琉璃琥珀器一百牀明月驪珠各十斛贈奏樂仙女乃

有四鶴立於車前載仙郎並相者侍者兼有寶花臺俄
進法膳凡數十味亦霑及璆韶璆韶飲有仙女捧玉箱托紅
牋筆硯而至請催粧詩於是劉綰詩曰玉為質兮花為
顏蟬為鬢兮雲為鬟何勞傅粉兮施渥丹早出娉婷兮
縹緲間於是茅盈詩云水晶帳開銀燭明風搖珠珮連
雲清休勻紅粉飾花態早駕雙鸞朝玉京巢父詩曰三
星在天銀河迴人間曙色東方來玉苗瓊藥亦宜夜莫
使一花衝曉開詩既入內有環珮聲即有玉女數十引

仙郎入帳召璆韶行禮禮畢二書生復引璆韶辭夫人
夫人曰非無至寶可以相贈但爾力不任挈耳各賜延
壽酒一盃曰可增人間半甲子復命衛符卿等引還人
間無使歸途寂寞於是二童引璆韶而去折花傾酒步
步惜別衛君謂璆韶曰夫人白日上昇駭鸞駕鶴在積
習而已未有積德累仁抱才蘊學卒不享爵祿者吾未
之信儻吾子塵牢可踰俗桎可脫自今十五年後待子
於三十六峰願珍重自愛復出來時車門握手告別別

訖行四五步杳失所在唯有嵩山嵯峨倚天得樵徑而歸及還家已歲餘室人招魂葬於北邙之原墳草宿矣於是璆韶捐棄家室同入少室山今不知所在

出纂異記

裴航

唐長慶中有裴航秀才因下第遊於鄂渚謁故舊友人崔相國值相國贈錢二十萬逵挈歸於京因傭巨舟載於湘漢同載有樊夫人乃國色也言詞問接幃帳昵洽航雖親切無計道達而會面焉因賂侍妾裊烟而求達詩

一章曰同為胡越猶懷想况遇天仙隔錦屏儻若玉京朝
會去願隨鸞鶴入青冥詩往久而無答航數詰裊烟烟
曰娘子見時若不聞如何航無計因在道求名醞珍果
而獻之夫人乃使裊烟召航相識及褰帷而玉瑩光寒
花明麗景雲低鬢髮月淡修眉舉止烟霞外人肯與塵
俗為偶航再拜揖盼眇良久之夫人曰妾有夫在漢南
將欲棄官而幽棲巖谷召某一訣耳深哀草擾慮不及
期豈更有情留盼他人的不然耶但喜與郎君同舟共

濟無以諧謔為意耳航曰不敢飲訖而歸操比冰霜不
可干冒夫人後使裊烟持詩一章曰一飲瓊漿百感生
玄霜搗盡見雲英藍橋便是神仙窟何必崎嶇上玉清
航覽之空愧佩而已然亦不能洞達詩之旨趣後更不
復見但使裊烟達寒暄而已遂抵襄漢與使婢挈粧奩
不告辭而去人不能知其所造航遍求訪之滅跡匿形
竟無蹤兆遂飾粧歸輦下經藍橋驛側近因渴甚遂下
道求漿而飲見茅屋三四間低而復隘有老嫗緝麻苧

航揖之求漿，嫗咄曰：雲英擎一甌漿來，郎君要飲航訝之。憶樊夫人詩有雲：英之句深，不自會俄於葦箔之下。出雙玉手捧瓷甌，航接飲之，真玉液也。但覺異香氤鬱透於戶外，因還甌，遽揭箔覩一女子，露裊瓊英，春融雪彩，臉欺膩玉，鬢若濃雲，嬌而掩面，蔽身雖紅蘭之隱幽谷，不足比其芳麗也。航驚，但植足而不能去。因白嫗曰：某僕馬甚饑，願憇於此。當厚答謝，幸無見阻。嫗曰：任郎君自便。且遂飯。僕秣馬良久，謂嫗曰：向覩小娘子豔麗，驚

人姿容擢世所以躊躇而不能適願納厚禮而娶之可乎
媪曰渠已許嫁一人但時未就耳我今老病只有此女
孫昨有神仙遺靈丹一刀圭但須玉杵臼搗之百日
方可就吞當得後天而老君約取此女者得玉杵臼吾
當與之也其餘金帛吾無用處耳航拜謝曰願以百日
為期必攜杵臼而至更無他許人媪曰然航恨恨而去
及至京國殊不以舉事為意但於坊曲鬧市喧衢而高
聲訪其玉杵臼曾無影響或遇朋友若不相識衆言為

狂人數月餘日或遇一貨玉老翁曰近得虢州藥舖卞
老書云有玉杵白貨之郎君懇求如此此君吾當為書
導達航媿荷珍重果獲杵白卞老曰非二百緡不可得
航乃瀉囊兼貨僕馬方及其數遂步驟獨挈而抵藍橋
昔日姬大笑曰有如是信士乎吾豈愛惜女子而不矜
其勞哉女亦微笑曰雖然更為吾搗藥百日方議姻好
姬於襟帶間解藥航即搗之晝為而夜息夜則姬收藥
臼於內室航又聞搗藥聲因窺之有玉兔持杵臼而雪

光輝室可鑒毫芒於是航之意愈堅如此日足嫗持而吞之曰吾當入洞而告姻戚為裴郎具帳幃遂挈女入山謂航曰但少留此逡巡車馬僕隸迎航而往別見一大第連雲珠扉晷日內有帳幄屏幃珠翠珍玩莫不臻至愈如貴戚家焉仙童侍女引航入帳就禮訖航拜嫗悲泣感荷嫗曰裴郎自是清冷裴真人子孫業當出世不足深媿老嫗也及引見諸賓多神仙中人也後有仙女鬢髻霓衣云是妻之姊耳航拜訖女曰裴郎不相識

耶航曰昔非姻好不省拜侍女曰不憶鄂渚同舟回而
抵襄漢乎航深驚怛懇悃陳謝後問左右曰是小娘子
之姊雲翹夫人劉綱仙君之妻也已是高真為玉皇之
女吏嫗遂遣航將妻入玉峰洞中瓊樓珠室而居之餌
以絳雪瓊英之丹體性清虛毛髮紺綠神化自在超為
上仙至太和中友人盧顥遇之於藍橋驛之西因說得
道之事遂贈藍田美玉十斤紫府雲丹一粒叙話永日
使達書於親愛盧顥稽顙曰兄既得道如何乞一言而

教授航曰老子曰虛其心實其腹今之人心愈實何由
得道之理盧子憮然而語之曰心多妄想腹漏精溢即
虛實可知矣凡人自有不死之術還丹之方但子未便
可教異日言之盧子知不可請但終宴而去後世人莫

有遇者

出傳

太平廣記卷五十